



*Jumat, 20 Agustus 2021*

**Ogen: Masmur 119:145-149**



*O Tuhan, aloi min aku*



**M**ungkin kita pernah lit i bas situasi ngalaken perbeben si mberat. Mawen erkiteken buena ntah beratna perbeben e, tempa-tempa lanai ngasup pe kita mabasa. Maka akhirna kita erlebuh, serko mindo penampat i bas Dibata nari. Bas erlebuh man Tuhan, si gejab je pusuh si tuhu-tuhu erpengendes man Tuhan. Pemasmur bas ogenta pe ngenanami masa-masa sulit, nterem kalak fasik si ngayak-ngayak ia si jahat ukurna. Bas situasi e, pemasmur labo ndarami penampat i bas ise pe, tapi ia erlebuh man Tuhan. Bage tutusna pemasmur erlebuh man Tuhan, maka ope pultak matawari pe enggo ia ertoto. Gedang-gedang berngi matana la tunduh, erkiteken ngukuri peraturen Tuhan bas pusuhna. Enda me erga si harus ibayar pemasmur guna ndatken jawaben i bas Dibata nari. Pemasmur saber nimai Tuhan ngaloi ia. Labo ia kote, kelsehen ntah pe pustus asa. Tapi yakin ia nimai jawaben Tuhan.

Kuga kita? Apakah i bas perbeben sinihadapi kita, tetap Dibata si andalken? Bas persoalen kegeluhen si mawen la kita ngasup ngalakensa, kuja kita erlebuh mindo penampat? Apakah i bas rehna perbeben man alanken, ertutusna kita nembah Tuhan, erpaguhna kinitekenta, atau justru erkotena kita, erdauhna ras Tuhan piah dungna kita putus asa. Sabap megati la kita saber nimai Tuhan ngaloi kita. Ateta ije kita erlebuh, ije ka mis Tuhan ngaloi kita. Adi lang siakap nge Tuhan e lanai mediate man banta, Tuhan e enggo nadingken kita. Kai si harus sibahan kita i bas nimai jawaben Tuhan?. Tetaplah tutus ertoto, ertutusna ka min kita ngoge katana, erjingkatna ka kita ndalanken perentahNa. Ingetlah, kesabaren kita pasti rulih.

Andalken Tuhan : tupung kita kote, tupung lanai terbelasken alu kata-kata, Tuhan pasti nampati.